

GHT Gagauz dilini yonmaa brakmadı

Gagauziya Başkanı, onun İspolkomu hem Üüredicilik Upravleniyası artık 5 yıl sıravardı durmamayca hem susaraktan gagauz dilini yonêr. Bu yıl da, maamilâ surat, nesoy sa uydurma “Pilotny proekt”a görâ, hep ölä susaraktan, “gagauz dili”ni hem “gagauz istoriyası, kulturası hem adetleri” predmetlarını birleştirip, gagauzluun bir kökünü kesmä başladı.

Gagauz dilin patriotları hem üüredicileri buna karşı poträ kaldırdılar, ama İrina VLAH hem onun Üüredicilik Upravleniyası, saar kalıp, Ceviz ayın (sentabri) 1-dän bildiini yaptı – “Pilotny proekt”ını 20 şkolaya soktu. Hem çok önemni: **sade gagauz şkolalarına!!!** Bulgarlara, moldovannara hem ukrayinnerâ bu proektlan hiç yaklaşamadılar da!

Bıçak kertää dayandı! Ozaman Gagauziya Halk Topluşu deputatları Elena KARAMİT, Ekaterina JEKOVA, Mihail JELEZOGLU hem GHTnın bilim, üüredicilik, kultura, dil hem dinnâr komisiyanın başı Dimitriy MANASTIRLI teklif ettilär bu soruşu GHT toplantısında incelemää hem buna karşı koymaa deyni karar almaa.



Bakmadaan ona, ani Gagauziya Başkanı İrina VLAH, onun yardımcısı Olesâ TANASOGLU hem Üüredicilik Upravleniyasının başı Nataliya KRİSTEVA getirtmiştilär toplantıya gagauz dilin düşmannarını, ölä nicâ Çadır “M. Guboglu” lişeyin direktoru Elena YURÇENKO hem taa birkaç onun gibilerdän, hem da bakmayıp ona, ani Gagauziya Başkanı “işlemiştî” kendi GHT deputatlarınan, Gagauziya Halk Topluşu aldı karar, **ani Üüredicilik Upravleniyası, bu şüpele “Pilotny proekt”tan vazgeçip, “gagauz dili”ni hem “gagauz istoriyası, kulturası hem adetleri” predmetlarını ayırsın da eski durumuna getirsin.**

Lääzim urgulamaa, ani GHT toplantısında bulunan 24 deputattan bu Karar için 20-si elini kaldırdı. Bu 20-nin arasında vardı onnar da, kimi biz “Başkanın deputatları” olarak bileriz.

Bakalım Gagauziya Başkanı İrina VLAH bu karara karşı angı adımı yapacak?

Bilgilär Günündä eni üürenmäk yılına sevinmeliklän hem umutlan Kırlannar İlya SINKU gimnaziyasına elektronika yardımı



Ceviz ayın (sentabri) 1-dä, taman eni üürenmäk yılın çeketmesindä hem Bilgilär Günündä Türkiye Respublikası Gagauziyanın Kırlannar (Kotovskoe) küüyün İlya SINKU gimnaziyasının hepsi üürencilerinä hem üüredicilerinä büyük baaşışlar getirdi – 90 planşet hem 17 noutbuk. Baaşışları vermäk sırasında Türkiye Respublikasının Kişinev Büükelçisi Gürol SÖKMENSÜER söledi, ani “Baaşışları Türkiye halkın adından Gagauziyaya getirdi Türkiye Respublikasının dışişleri Bakanı Mevlüt ÇAVUŞOĞLU, angısı Harman ayın (avgust) 26-27 günneri arasında Moldova-da hem Gagauziyada ofițial vizitlan bulundu”. (Patrettä: (öndä) Melaniya TATAR).

4-cü sayfada

Anketanın KOKUSU te neredän çıktı

2020-ci yılın Büük ayın 31-dä çıkan “Ana Sözü” gazetasının nomerindä tiparladık bir statya “*Bakalım bu işin kokusu neredän çıkacak?*”, neredä yazdıydık, ani Gagauziya avtonomiyasının 25-ci yıldönümünä karşı Gagauziyanın üüredicilik Upravleniyasının hepsi zaametçileri, öncedän islää hazırlanmış provakaşiyalı bir iş yaptılar: susaraktan avtobuslarlan şkolalara gidip, üürencilerä rus dilindä bir anketa doldurttular.

Anketada duraydı soruş: **Как вы думаете, НУЖНО ЛИ В ГАГАУЗИИ УПРАВЛЕНИЕ ОБРАЗОВАНИЯ ИДУЩЕЕ ПРОТИВ ГАГАУЗСКОГО ЯЗЫКА?** (Nicâ siz düşünersiniz, lääzim mı Gagauziyada Gagauz Dilinä karşı gidän Gagauziyanın üüredicilik Upravleniyası?) bunun cuvabı kesin olaceydı – **DIİL LÄÄZİM!**


Ama orada, 10 soruştan 9-cusunda koyuluydu provokatorluk soruşu: **Как вы думаете, гагаузский язык является важным в вашем образовании?** (Nicâ siz düşünersiniz, gagauz dili önemni mi sizin üürenmenizdä?) Biz taa ozaman yazdık, ani bu anke-

ta işi pek kuşku bir iş! Da sorduk: Bakalım bu işin kokusu neredän çıkacak?

Da te KOKUSU çıktı – Gagauziya Halk Topluşunda üüredicilik için cuvap edän bürokratlar, bir şüpele “Pilotny proekt”lan GAGAUZ DİLİN kesmesindä, bu YALANCI hem UYDURMA anketayı açıktan **en büük argument olarak önä çıkardılar.** Nicâ var bir laf: kendimiz pişirdik, ama sizä idireriz.

İdirämedilär! Saa olsunar GHTnın 20 deputatı, ani buna karşı çıktılar.

Açan GAGAUZ DİLİN düşmanları deerlär, ani gagauz dilini bu kadar üürenmäk saatları uşaklara büük aarlık



olarmış – onnar bununnan sadä kendileri kayıl olêrlar. Ama, açan gagauz dilini kesip, hep okadar üürenmäk saatları “Pilotny proekt” için brakêrlar – bunun için kendileri susêrlar.

Diil lääzim bu kadaran ikiüzlü olmaa! Ama son 5 yılda ikiüzlülük Gagauziya baş kuvetlerinin bayraa oldu.

Gagauziyada gagauz dilini neçin kesmäâ savaşırlar? Dooru: **romın dilinä ön vermäklän gagauzları Romıniyaya karşı kaldırmak için!**

Hiç birisi demeer, ani romın dilinä ön vermää diil lääzim. Lääzim! Hem çoktan lääzim! Ama diil GAGAUZ DİLİN yok edilmesinnän. **3-cü sayfa**

Eni stadionda ilk ofițial ȳeremoniya – sportsmennarlan

Türkiye Prezidenti Sayın Recep Tayyip ERDOĞANın Gagauziyaya 2018-ci yılın Canavar ayın 18-dä vizitında izininä görä Türkiye Pravitelstvosu tarafından Komratta yapılan stadionda 2020-ci yılın Ceviz ayın 17-dä oldu gözäl bir ȳeremoniya – 2019-cu yıl sport sezonunda büyük başarıları gösterän Gagauziya sportsmennarın kutlanılması hem ödülleniilmesi.

2019-cu yıl sport sezonunda Gagauziya sportsmennarın erindeki, respublikadaki hem halklararası yarışlarda büyük başarıları gösterdilär, kazanıp 149 medali. Onnarın arasında: Dünnää ȳempionatlarında – 3 altın, 2 gümüş hem 4 bronz medali; Evropa ȳempionatlarında – 1 altın, 1 gümüş hem 6 bronz

medali; Moldova ȳempionatlarında – 42 altın, 37 gümüş hem 53 bronz medali.

Kutlama hem ödülleni sırasında hepsi bu sportsmennara verildi Diplomnar hem para ödülleri.

ȳeremoniyasında pay aldılar Gagauziya Başkanı İrina VLAH, Gagauziya Halk Topluşı Başı Vladimir

KISSA, Gagauziya kultura hem turizma upravleniyanın başı Sergey STOYANOGLU, Komrat kasabanın pımarı Sergey ANASTASOV hem Gagauziya sport federatıyaların başları.

Not. Gagauziya kultura hem turizma upravleniyanın açıklamasına görä Gagauziyada var 9 sport şolası hem 1 sport lıȳeyi, angılarında üü-rener 3 bin 228 uşak. Onnara trenirovka yapêrlar 135 trener, angıların 5-şi üüsek kategoriyalı, 3-çü – 1-ci kategoriyalı, 60-sı da 2-ci kategoriyalı.

Patretlär: vlah.md hem molodejsport-ge.md



Bekim etti artık Gagauziyada “Ayr, buyur!” (“Divide et impera”) sistemasını kullanmaa?

Ceviz ayın 17-dä eni yapılan Komrat stadionunda oldu 2019-cu yıl sport sezonunda büyük başarıları gösterän Gagauziya sportsmennarın kutlanılması hem ödülleniilmesi ȳeremoniyası. Ama üzä çıktı, ani diil hepsi başarılı sportsmennar için...

2020-ci yılın Ceviz ayın (sentabri) 17-nädän sayardım, ani Gagauziya Başkanın yok gözü görmää sadä onnarı, kim onun gagauz halkına karşı hayınnı hem Gagauziyayı yok edilmesi için savaşmasını gagauzlara hem dünnääya açıklêr: GHT deputatlarını, Gagauz Respublikasını haliz kuranı, cümne hem kultura insannarını, yazıcıları, baamsız jurnalitleri. May taa ilk günündän beeri Canabisi büyük bir kinniklän hem taa çok susaraktan savaşêr silmää, kıymaa hem yok etmää bu insannarı, zapaya koyêr gagauzların parasınnan işleyän Gagauz Radio hem Televideniyasına onnarın kolverilmesini, gagauzların parasınnan yapılan ȳeşitli kultura, ekonomika hem cümne toplantılarına katılmalarını, onnarı ödül listelerindän siler, onnara türlü baskılar düzenneer.

Öbür taraftan, paalı Başkan, üüsää kaldırêr gagauz halkın düşmannarını, yaltakları, türlü bilinmeyän erifleri, ani onu her taraftan yalêrlar. Ödül hem para verer gagauz devletliin düşmannarına, gagauz dilini yok edennerä, gagauzları kıran komunist partiyasının yalancı azalarına, yalancı istoriklerä, uydurma hem beldän aşaa “bilim insannarına”, yarım kapeyka yapmayan kişilerä. Bu sırayı taa çok çok var nicä uzaltmaa.

Hadi, bu adımnarı var nicä annamaa, zerä onun tarafından kaldırılan hiç bişey yapmayan hem yok kişiler “Güneşä” yok nicä gölgä atsınnar – öbürlerdän korkêr, zerä var nicä olsun güneş tutulması da onnardan “Güneş” gölgedä kalsın...

Ama büyük sportȳılardan Başkan ne zarar var nicä olsun?

Laf gider Gagauziyanın anılmış sportsmeni hem trenerı, dzüdo hem sambo güreşlerindä Dünnää hem Evropa ȳempionatlarına katılan, Moldova Respublikasının dzüdo güreşindä 5 kerä ȳempionu hem çok kerä prizörü, dzüdo hem sambo güreşlerindä sport masterlına kandidat, “Komrat muniȳipiyin kıymetli insanı” adını taşıyan Pötr MARDAR için.

Gagauziya sportsmennarın kutlanılması hem ödülleniilmesi ȳeremoniyasında Canabisi da vardı, ama onu başkannar ȳaarmamıştılar, bu üzerä da “başkannar” Pötr MARDARı hiç “esap almadılar”.

Nicä açıkladı Pötr MARDAR kendisi, ȳeremoniya bittiyän, o yaklaşmış Gagauziya Başkanına İrina VLAH da sormuş: Neçin ona da ödül vermemişlär? Pötr MARDAR yazêr, ani cuvar erinä İrina VLAH neçin sa sormuş: Pötr MARDAR Zakonu sayan bir vatandaş mı?

Neyä gelir bu, acaba? Bu üzerä Pötr MARDAR sorêr: «Стоит ли мне ожидать давление от властей?» (“Kuvettä bulunnarın baskısını mı bekleyeyim?”)

Te ne yazêr soşial aalarında kendi Facebook sayfasında Pötr MARDAR: «Это уже ни в какие ворота не лезет! Даже в ворота, на красивом, почти достроенном новом стадионе



в Комрате! Была отдана честь и премирование спортсменов из Гагаузии, по достигнутым результатам за 2019 – спортивный год. С чем, искренне поздравляю весь спортивный мир Гагаузии. Это мероприятие создано для самых волевых, стремящихся к справедливости, добру и истине людей. Пригласили на это красивое торжество мои друзья, близкие по духу люди. В 2019 году, стал Чемпионом Международных соревнований и бронзовым призëром Чемпионата Молдовы по самбо, среди мужчин. Вошël в сборную страны. Хотя до 2019 года, не кому не уступал и был 1-м номером в сборной. Готовился в одиночку, то есть и тренер, и спортсмен в одном лице. Кто сказал, что такое невозможно?

В 2019 году из-за подрыва мораль-

но-психологического состояния не сумел стать 1-м, но всё же смог «ворваться» на пьедестал. Но, мои спортивные достижения, игнорируют уже не в первый год, как и в этом году!

Не удержался и по окончании мероприятия. Подбежал к Башкану, Гагаузскому министру молодежи и спорта (Gagauziya kultura hem turizma upravleniyanın başı Sergey STOYANOGLU – nışan “AS”) и к депутату Народного Собрания Гагаузии. Башкан немного пообщавшись, уехала. Уверен, что должность обременена многозадачностью. Ирина Фëдоровна, задала мне вопрос: Законопослушный ли я гражданин? Я так и не понял, с какой целью был задан этот вопрос, в рамках сегодняшнего мероприятия.

Вопрос: Стоит ли мне ожидать давления от властей, в том числе и самого Башкана? Исходя из вопроса, который был мне задан. Жизнь в Гагаузии и так, мёдом не намазана! Или намазана, но не для всех! Отписка в виде «я – как тренер не предоставил информацию, о премировании спортсмена и поэтому я не попал в список». Не пройдёт! Я мониторил сайт молодежи и спорта, и не было ни какой информации по мероприятию!»

Pötr MARDARlan bölä yapılması olmadı mı Gagauziyada kuvettä bulunnarın tarafından ödül ȳeremoniyasına bir damna katran katılması?! Bekim etti artık Gagauziyada “Ayr, buyur!” (“Divide et impera”, «Разделяй и властвуй») sistemasını kullanmaa?! Bizi ölä da 5 yılın içindä amansız kırdılar. Şindi sportsmennara da etiştilär.

Todur ZANET, Akademik hem poet

Anketanın KOKUSU te neredän çıktı

Sonu. Çeketmesi 1-ci sayfada.

Esaba alarak onu, ani Gagauziya Başkanı İrina VLAH başladı hererdä kendi romincasını göstermää, onun yapılacak adımı da var nicä olsun ölä: Gagauziyada, GAGAUZ DİLİNİ ke-sip, romın dilin yayılmasının yolunu genişletmää. Genişleder da: romın dilin öğrenmesini uşak başçalarında hem şkolalarda geçirer, Komrat'ta romın lişeyi yapêr, gagauz dilin saatlarını romın dilinä verdirmää savaşêr, gagauz lişeylerinde maasuz romın klasları açêr. Gagauziyada ofițial sıralarda kendisi da, gagauz dilinin erinä, romın dilindä lafeder, insanı ahmak erinä tutup, romın dilinä deer – devlet dili.

Şindi bakalım taa ne romın dili lüzgerleri Gagauziyanın üstündä başladı esmää?!

Bu yıldan Gagauziyada vardı 3 şkola, neredä romın dilindä öğrenmâk yapıldı. Şindi ona eklendi 4-cüsü – Çadır kasabasının 2-ci lişeyi, neredä Ceviz ayın (sentabri) 1-dän beeri 26 kişilik romın dili klasi kuruldu. O klasın remondu için Gagauziya İspolkomu maasuz 300 bin ley verdi.

Ama Gagauziyada romın dilin öğrenmesinin yayılmasının ilgili planları Ceviz ayın (sentabri) 18-dä heptän açıkladı Moldova üredicilik, kultura hem aaraştırma ministerliin ministrusu İgor ŞAROV, kendisinin OBSEnin azınlıkların işlerine bakan Baş ko-

misarı Kristof KAMPlan (Christophe Kamp) on-lain görüşmesindä, neredä urguladı, ani “*ministerlik aarêêr çözüm, ki çok dilli programa, ani çalışêr artık Gagauziyanın uşak başçalarında, Gagauziyanın şkolalarında da yayılsın*”.

Moldova üredicilik ministrusu “**bu uurda POLİTİKANın kurulması**” için OBSE Baş komisarından yardım istedi: “*Herliim bunu yapabilir-sak (programanın yayılmasını – nişan “AS”), bu regionun uşakları angliycayı hem romıncayı üürendiynän, gelecektä taa çok aarıştırmalar yapsınнар deyni onnara kolaylunu verecez. Biz isteriz, ani bu uurda politikanın kurulması için siz bizä arka olasınız*”.

İgor ŞAROV açıkladı, ani ministerliin neeti – başlangıç şkolalarda çok dilli üredicilik pilot proektlerini başlatmaa.

Kalêr salt bir iş sancıylan eklemää: **büünkü gündä Gagauziyanın gagauz dilindä hiç bir şkolası yok hem... nicä görünêr – olmayacak ta! Rus, bulgar, romın şkolaları var, ama gagauz şkolaları yok!**

Bununnan Gagauziya bitti! Taa doorusu – bununnan başına yalannan getirilân bulgarkalar hem bulgarlar Gagauziyamızı bitirdilêr! Susaraktan hem gülümseyêrêk Gagauz Dilimizä büyük bir bıçak sapladı. Ölä, nicä sapladılar onu 1961-dä, nicä sapladılar 1984-tä, 1988-dä, XXI-ci üzyılın başında.

Todur ZANET, Akademik hem poet

“Oglan masal okuyêr – 2” kiyadını tanıttılar

Ceviz ayın (sentabri) 3-dä Gagauziyanın Başkanlık binasının büyük başında oldu prezentațiya uşaklar için kiyada “Oglan masal okuyêr – 2”, angısını hazırladı Viktor KOPUŞÇU.



Kiyadı tanıttılar Gagauziyanın “Lumina” cümne kuruluşun başı Viktor KOPUŞÇU, Ankara “Gagauzlar” dernään başın yardımcısı Sergey MANASTIRLI hem popaz Sergey KOPUŞÇU.

Prezentațiya da açıklandı, ani bu kiyada toplu 5 gagauz halk masalı. Nicä da birincisi, bu kiyat ta yapılı komp-

yutor grafikasında çift resimnêrlân: sol sayfada kiyadın resimcisi Olga STAMOVA-KULEVA yapmış masaldan renkli bir resim, saa sayfada sa – resimin sadä konturu çizili. Bu konturu uşaklar lääzım kendileri boyasınнар.

“Oglan masal okuyêr – 2” kiyadın çıkmasına deyni para yardımı yapmış

Ankara “Gagauzlar” dernää. Kiyadın tirajı 2 bin taanä. O daadılacak Gagauziyada hem Ukrayınada gagauz küülerinin 2-ci klasta gagauz üürencilerine.

Patretlêr: gagauzinfo.md



Gagauzları öldürân BANDİTleri neçin idol yapêrlar?

Bibliyada 10 Emir in 2-si deer: “Kendin için idol yapma hem hiç bir resim yapmayacan ona, ne bulunêr yukarda göklerde, aşaaada erdä, erin altında sularda, onnara ülmeyecän hem dua etmeyecän” (Çıkış: 20:2–17). Ama Sovetlêr Birlii geldiindän beeri bu Emir amansız kırılêr hem gagauzları kıran hem öldürân BANDİTlerä, küülerimizdä hem kasabalarımızda metinni nişan taşları koyup, baş iiltmä zorladêrlar, onnardan idol yapıp, o idollara dua ettirêrlêr.

Bu yalancı idolların birisi Garizan Mihail Afanasievich (1919–1949), angısına 2015-ci yılın Harman ayın (avgust) 28-dä Kıpçak küüyün primariyası, maamilä surat kendisinin hem cümne insannarın adından, küüyün Kultura Evinin önündä ansızdan koydu bir anmak taşı, çünkü bu “insan” “Büük Vatan Cengin kahramanıymış”.

Kıpçaan Kultura Evinin önündä anmak taşta yazılı, ani bu erif pek islää cenk etmiş, devlet ordennarını kabletmiş, 60 nemşeyi öldürmüş hem 20-dän zeedesini esir almış h.t.b.

Bekim ölä. Var nicä olsun. Bu işleri bân şüpä altına koymêêrim hem koymaa istâmeerim. Bekim bu erif “Büük Vatan Cengin kahramanı”, ama gagauzlara deyni o bir BANDİT, ani 1945-1949 yıllarda Kıpçak küüyün hem dolay küülerin insannarını kapannara attı, düüdü, ezdi, açlıktan öldürdü, Sibirä kaldırdı hem gagauzlara karşı taa çok miskin işleri yaptı. Bu beterä da o zavalıların tarafından da öldürüldü.

Bu erifin kısa hem kannı yaşamasının son 4 yılı için hem ölmesi için Kıpçak prişmariyasının saytında pek meraklı bir cümlä buldum: «После

тяжелого ранения и контузии Михаил Гаризан в 1945 году вернулся домой в гагаузское село Кончак (Молдавская ССР), где в 1949 году погиб от рук бандитов».

После тяжелого ранения и контузии Михаил Гаризан в 1945 году вернулся домой в гагаузское село Кончак (Молдавская ССР), где в 1949 году погиб от рук бандитов.

Bu cümledä «погиб от рук бандитов» (banditlerin tarafından öldürüldü) lafları için taa aşaaada yazacam, ama şindi bakılımla ne olardı gagauz küülerindä, onnarın arasında Kıpçak küüyündä da, 1945-1949 yıllarında.

Çekedip 1944-cü yıldan beeri Sovet rejimin represiyalar maşinası başladı çalışkan hem çorbacı gagauzları ezmää, kırmaa, kapannara atmaa, adamnarı zorlan şahtalara almaa. Kim buna karşı koymaa savaşardı – ya kapannarda çürüyüdü, ya da bir izsiz kara kayıp olardı.

1944-1945 ardına geldi Sovet rejimin 1946-1947 yıllarda gagauzlara karşı zorlan yapılan Açlık Genoîdi (bak: <http://anasozu.com/gagauzlara-karsi-yapilan-aaclik-genitidin-70-ci-kara-yildonumu-hem-o-genotidin-buunku-sonuclari/>).

Taa sora da 1947-1948 yıllarında

kolhozların kurulması hem insannardan çiftçilik avadannıklarının, öküzlerin, beygirlerin, büyük baş malların zorlan alınması.

Taa da sora 1949-da diri kalan çorbacıları Sibirä kaldırılması.

Hepsi bu represiya yıllarında Garizan Mihail Afanasievich bunun içindä – becerikliklân gagauzları kırêr. Neyin beterinä da bu ezilân, düülân, kırğınık görân kurbannarın tarafından da öldürüldü.

Şindi bakalım bu «погиб от рук бандитов» laflardan banditlêr kim?

Banditlêr – o zavalı gagauzlar mı, kimi bu erif hem onun gibilêr 1945-1949 yıllarında kabaatsız kapannara attı, düüdü hem ezdi?! O sa BANDİT gagauzları ezân Garizan Mihail Afanasievich mi hem onun gibilêr mi?

Banditlêr – o çiftçi gagauzlar mı, kimin aullarına hem evlerine 1946-da girip, bu erif hem onun gibilêr, bandit gibi, bitki teneyi hem trofayı aldı?! O sa BANDİT gagauzları açlıklan öldürân Garizan Mihail Afanasievich mi hem onun gibilêr mi?

Banditlêr – o çalışkan gagauzlar mı, kimi bu erif hem onun gibilêr Sibirä

kaldırdı?! O sa BANDİT – Sibir yolunda gagauzları hayvan vagonlarında susuz hem aac öldürân Garizan Mihail Afanasievich mi hem onun gibilêr mi?

Bana kalsa cevap belli!

Beki etti türlü sündükleri, ani gagauzları kıydılar hem ezdiler, onnara karşı Açlık Genoîdi yaptılar, ani gagauzları Sibirlerä kaldırdılar, GULAGlara attılar, okadaradan üüselmää, onnardan büyük idollar yapmaa?!

Beki sıra geldi kaldırmaa bu yalancı kahraman idolların nişan taşlarını primariyaların, şkolaların, küü meydanlarının, Komrat Üniversitinin önündä bulunan “Şan Aleyası”ndan hem başka erlerden da onnarın erinä koymaa Gagauz Halkının AÇLIK, GENOİD, DEPORTAȚIYA kurbannarını anmak için yası yazılarla dolu kara taşları?!

Kıpçak primariyasına da teklif ederim bu “erifin” anmak taşı erinä koysunnar taşları, neredä yazsınнар o 3 bindän zeedä kıpçaklıların adlarını, ani “garizancıklar hem onun gibilêr” beterinä Açlık Genoîdına hem Sibirlerä kabaatsız kurban oldular.

Akademik hem poet Todur ZANET, Gagauz Millî Gimnânın avtoru

Zor vakıta bizi unutmadınız için sizä, Kırlannar İlya SINKU gimnaziyasına elektronika yardımı



Türkiye Respublikasının Kişinev Büükelçisi Gürol SÖKMENSÜER urguladı, ani pek seviner, “ki bu baaşışlar etiştı zoru olan hem ana yollardan uzakta kalan küüyün gimnaziyasına hem o

Çeviz ayın (sentabri) 1-dä, taman eni üürenmäk yılın çeketmesindä hem Bilgilär Günündä Türkiye Respublikası Gagauziyanın Kırlannar (Kotovskoe) küüyün İlya SINKU gimnaziyasının hepsi üürencilerine hem üüredicilerine büyük baaşışlar getirdi – 90 planşet hem 17 noutbuk. Baaşışları vermäk sırasında Türkiye Respublikasının Kişinev Büükelçisi Gürol SÖKMENSÜER söledi, ani “Baaşışları Türkiye halkın adından Gagauziyaya getirdi Türkiye Respublikasının dışışleri Bakanı Mevlüt ÇAVUŞOĞLU, angısı Harman ayın (avgust) 26-27 günneri arasında Moldova-da hem Gagauziyada ofițial vizitlan bulundu”.

verecek kolayını bu pandemiya vakıdında uşaklar üürenmäk proşesından kopmasınlar”.

Gagauziya Başkanı İrina VLAH kendi nasaatında şükür etti Türkiye kardaşlarımıza bu hem taa ileri yapılan büyük yardımın için, hem urguladı, ani ilk kerä olêr olê ki bir üüredicilik kuruluşun hepsi üürencilerine hem hepsi üüredicilerine birdän bölä baaşışlar yapılêr.

Başkanın bu sözlerindän sora, gimnaziyanın aulu içindä toplu, hepsi üürencilär sevinmâklän baardılar hem Gagauziyanın, Moldovanın hem Türkiyenin bayraklarını sallamaa başladılar.



Gagauziya üüredicilik Upravleniya-sı Başı yardımcısı Anna RUSSU şükür etti Türkiye'ye hem TİKaya, ani her kerä yardım ederlär Gagauziyanın üüredicilik kuruluşlarına, ne verer kolayını üüretmäk sistemasını kaavileştirmää.

İlya SINKU gimnaziyasının direktörü Georgiy Stepanoviç ÇEBANOV, kolektivin hem üürencilerin adından şükür etti Türkiye'ye hem Türkiye Büükelçisine bu paalı baaşışlar için.

Ofițial nasaatlardan sora, paalı musaafirlerä deyni gimnaziyanın üü-

rencileri peet okudular hem çaldılar türküyü “Yaşa, Halkım!” (laflar – To-dur ZANET, muzika – İlya FİLEV).

Baaşışları vermäk sırasında taa pay aldılar Türk İşbirlii hem Koordinatıya Agenstvossu Başkan-nın (TİKA) Kişinev programaların Koordinatörü Selda ÖZDENOĞLU, Türkiye Respublikasının Komrat Başkonsulu Hasan AKDOĞAN hem, belliki, Kırlannar (Kotovskoe) küüyün gimnaziyasının bütün kolektivi hem üürencileri.



Moldovanın Ratuş küüyün gimnaziyasına planşet hem noutbuk

Çeviz ayın (sentabri) 4-dä Türkiye Respublikasının Kişinev Büükelçisi Gürol SÖKMENSÜER, Türkiye Respublikasının dışışleri Bakanı Mevlüt ÇAVUŞOĞLUNUN adından getirdi Moldovanın Kriulän rayonun Dräslıcenı komunasının Ratuş küüyün gimnaziyasının herbir 135 üürencisine planşet hem 16 üüredicisine noutbuk.

Gimnaziyanın aulunda olan baaşış vermäk sırasında, T.C. Büükelçisindän kaarä, pay aldılar Moldova üüredicilik, kultura hem aaraştırma ministerliin ministrusu İgor ŞAROV, Kriulän rayonun predsdateli Pavel SPİNU, Dräslıcenı komunasının primarı Petru BUZU, Kriulän rayonun üüredicilik bölümün başı Alla UNGUREAN hem Ratuş küüyün gimnaziyasının geçici direktörü Elena BOAGHE.

Sırada nasaat edän Büükelçi Gürol SÖKMENSÜER söledi, ani “Baaşışları Türkiye halkın adından hem Moldovada Türk firmaların yardımınan Ratuş küüyün gimnaziyasına yolladı Türkiye Respublikasının dışışleri Bakanı Mevlüt ÇAVUŞOĞLU, angılarını Canabisi getirdi Harman ayın 26-27 günnerindä Moldovaya ofițial viziti zamanı”.

Büükelçi Gürol SÖKMENSÜER

söledi Ratuş küüyün gimnaziyasının üürencilerine hem üüredicilerine, ani hep bölä gözäl baaşışlar kablettilär Gagauziyanın Kırlannar küüyünün gimnaziyasında da.

Baaşış sırasında pay alanlar hepsi şükür ettilär sayın Gürol SÖKMENSÜERä hem Türkiye Respublikasına bu yardım için.

Kriulän rayonun predsdateli Pavel SPİNU verdi Türkiye Büükelçisine “Diploma de Onare” diplomasını, Dräslıcenı komunasının primarı Petru BUZU da verdi “Diplome de Excelență” diplomasını.



Ratuş küüyün gimnaziyasının geçici direktörü Elena BOAGHE da verdi paalı musaafirlerä birär sepet küüyün bereketinnän: üzümnärlän hem meyvalarlan.

Ayrıca üürencilerin hem üüredicilerin adından, moldovan milli rubalarına giimni, gimnaziyanın üürencileri şükür ettilär Türkiye Büükelçisine hem Türkiye Respublikasına candan verilän bu pek lääzımnı baaşışlar için.



acızgannara, çok saa olasin deeriz!

Gagauziyaya Türkiyedän meditiına ekipirovkası yardımı

Çeviz ayın (sentabri) 1-dä, Gagauziya İspolkomun büyük başında Türkiye Kişinev Büyükelçisi Gürol SÖKMENSÜER verdi Gagauziya bolnițalarına meditiına ekipirovkası yardımı: 20 bin meditiına maskası, 1200 meditiına halatı hem 300 koruyucu tulum (kombinizon) hem koruyucu ekrannar.

Yardıma vermäk sırasında Büyükelçi Gürol SÖKMENSÜER söledi, ani bu yardımı, Harman ayın 26-27 günneri Moldovaya hem Gagauziyaya ofițial vizitında, Türkiye halkın adından, getirdi Türkiye Respublikasının dışışleri Bakanı Mevlüt ÇAVUŞOĞLU.

Yardıma vererek Büyükelçi Gürol SÖKMENSÜER urguladı, ani “Pandemiya belasında Türkiye Respublikası her zaman yardımda bulundu hem Moldovaya, hem da Moldovanın bir payı olan Gagauziyaya”.



Kendi tarafından Gagauziya Başkanı İrina VLAH, Gagauziyanın saalı koruma Upravleniyasının Başı Svetlana DULEVA hem sırada bulunan meditiına zaametçileri şükür ettilär Türkiyeyä bu paalı yardım için.

Moldova saalık ministerliinä Türkiyedän meditiına yardımı



Yardıma vermäk sırasında Türkiye Respublikasının Kişinev Büyükelçisi Gürol SÖKMENSÜER urguladı, ani “Bakmadaan ona, ki koronavirus pandemi-

Çeviz ayın (sentabri) 2-dä Türkiye Respublikasının Kişinev Büyükelçiliindä, COVID-19-za karşı koymaa deyni, Moldova saalık ministerliinä Türkiyedän meditiına tertipleri yardımı verildi: 30 bin meditiına maskası, 1400 meditiına fartukları hem 600 koruyucu halat.

yası bütün dünnäyä dokundu, Türkiye bu durumda savaştı hem savaşer kendi dostuna hem partnörüne Moldova Respublikasına yardım etmää”.

Büyükelçi Gürol SÖKMENSÜER söledi, ani bu kerä da, Moldovaya vizit yaparak, Türkiye Respublikasının dışışleri Bakanı Mevlüt ÇAVUŞOĞLU getirdi Moldova halkına Türkiye halkından meditiına hem kompyuter tertipleri yardımı.

Sırada pay alan Moldovanın saalı, işi hem cümneyi koruma ministerliin devlet sekretari Aleksandr HOLOSTENKO, şükür ederäk Türkiye Büyükelçiliinä bu yardım için, açıkladı, ani bu yardım, COVID-19-za karşı koyan personalı korumak için, respublikanın meditiına kuruluşların arasında payedilecek.



Romıniya Büyükelçiliindän Gagauziyaya bolnițalarına hem lițeyä yardım

Ceviz ayın (sentabri) 17-dä Romıniya Kişinev Büyükelçisi Daniel İONİȚĂ bir iş vizitnınnan Gagauziyada bulundu, neredä birkaç sırada hem buluşmada pay aldı, açıklanêr Romıniya Moldova Büyükelçiliin pres-relizında.



Vizit sırasında Büyükelçi Daniel İONİȚĂ, Gagauziya Başkanı İrina VLAH-lan hem Komrat Primarı Sergey ANASTASOV-lan birliktä, baktı nicä gider işlär Komrat “Mihai EMİNESKU” romın lițeyin eni korpusun düzülmesindä, ani yapılêr Romıniyanın bir büyük payda para yardımınnan.

6-cı sayfa

Şkolalara hem uşak başçalarına ABDdan kontaktsız termometra

Ceviz ayın (sentabri) 15-dä Moldovada Amerika Birleşik Devletlerin (ABD) Büyükelçisi Derek J. HOGAN (Dereck J. Hogan) getirdi Gagauziyaya 336 kontaktsız termometra da ABD halkının hem pravitelstvosunun adından baaşladı onnari şkolalara hem uşak başçalarına.

Kontaktsız termometraların verilmä sırası oldu Komrat 5-ci uşak başçasında, neredä pay aldı Gagauziya Başkanı İrina VLAH hem Komrat Primarı Sergey ANASTASOV.

COVID-19za karşı koymak için baaşıları vererek Büyükelçi Derek J.



HOGAN (Dereck J. Hogan) urguladı “Umudumuz var, ani şkolalar hem uşak başçaları işlemä başladınnan, bu alınan işlär verecek kolayanı üredicilerin, uşakların hem onnarın aylelerinin zararsızlını kurmaa. Bükünkü başlamalar – bu yaptımızların işlêrdän sadecä bir sıradaki akıya, angılarını biz yapêrız bu eşi olmayan zamannarda Moldovaya yardım etmää deyni”.

Patretlär: vlah.md

Üstolan Durum genä uzadıldı

Moldovada COVID-19-da Cümne saalında Üstolan Durumu Ceviz ayın (sentabri) 30-dan uzadıldı. Bölä kararı 11.09.2020 günündä aldı Moldovanın Cümne saalında Üstolan Durumu milli komisiyası.

Eski zapa altında kalan işlär (bak: <http://anasozu.com/cumne-saaliinda-ustolan-durum-gena-uzadildi/>) uzadıldı, sadä birkaç enilik var:

- 50 kişiyädän toplayan düünnär hem sıralar var nicä yapılsın;
- 50 kişiyädän toplantılar hem buluşmalar var nicä olsun;
- “eşil” zonalardan gelän, ama “kırmızı” zonalardan geçän (Ukrayna, Romıniya) vatandaşlar epidemiya dosyalarını doldurêrlar hem iki afta kendisindän izolâtiyada kalêrlar.

ATATÜRKün bobasının muzey kompleksini yaptıran Mazlum HASAN COVID-19-dan öldü

Makedoniya örük türklerin yaşadı Jupa kasabasının Merkez primariyasının eski Başkanı Mazlum HASAN 07.09.2020 günü raametli oldu.



Mazlum HASAN primar oldu zaman çalıştı, ani Jupa kasabasında restavrayıya yapılsın hem açılsın Mustafa Kemal ATATÜRKün bobası “Ali Rıza Efendi Anı Evi” muzey kompleksı.

Ozaman, bu üzerä Makedoniya Respublikası kultura Bakannı, Türk İşbirlii hem Koordinatıya Agenstvosu Başkannı (TİKA) hem Makedoniya Jupa kasabasının primariyası arasında protokol imzaladı.

Bu protokola görä başlatılan Mustafa Kemal ATATÜRKün bobası “Ali Rıza Efendi Anı Evi” muzey kompleksı, her iki memleket ustaları tarafından yapılan arheologiya araştırmaları hem çevrä küü evleri üzerinä yapılan incelemelär konusunda, proektlaştıırarak, bir buçuk yıl gibi kısa bir vakıтта aslıdan uygun olarak yapıldı.

07.09.2020 günü da Makedoniya-dan geldi haber, ani kendisi 50 yaşında COVID-19 hastalın beterinä Poyraz Makedoniyanın başkasabasında Üsküptä raametli oldu.

Allaa onu raamet etsin! Topracı ilinn olsun!

Romıniya Büükelçiliindän Gagauziyaya bolnițalarına hem lițeyä yardım



Sonu. Çeketmesi 5-ci sayfada

Bundan sora Romıniya Kişinev Büükelçisi verdi Komrat rayon bolnițasına 45 bin evroluk medițina tertipleri hem malları yardımını, angısı Romıniya Pravitelstvosunun tarafından imzalanan İlerlemek için Halklararası yıllık Planına koyulduydı hem RoAid agenstvosunun aracılınan Gagauziyaya getirildi. Bu yardım içindä var anesteziya hem intensiv terapiya bölümü için 8 medițina tertibi, ani COVID-19 durumunda verecek kolayını insannarı ilaçlamaa.

Komrattan sora Romıniya Kişinev Büükelçisi yollandı Çadır kasabasının 2-ci lițeyinä, neredä başladı I-IV klaslar için 20 romın dilini üürenmek kiyađı.

Yardımnarlan ilgili olarak Daniel İONİȚÄ bölä bir açık-

lama yaptı: “Üüredicilik hem saalu korımak – bu en önemni alannar, angılarında Romıniya arka olêr hem arka olacek Moldova Respublikasına, bakmadaan ona, angı politikacılar kuvettä bulunêrlar. Moldova Respublikasının vatandaşlarına bütün ürektän cömertçä yapılan yardımnar, politikaya görä uygulanmêêr hem yardımı kabledennerin etnika soyunnan hem dilinnän ilgili diil.

Ama hep bu vakıt, biz savaşıêrız, ani Romıniyanın Moldova Respublikasına arka olması garmoniya biçimindä EB hem EB azaları devletleri tarafından yapılan proektlarlan zeedelensin”.

Patretlär: vlah.md hem guogagauzii.md



Vengriya şkolalarımıza kompyutor verdi

Ceviz ayın 23-dä Vengriya Respublikasının Moldovada Büükelçiliindä oldu bir sıra, neredä Büükelçi Şandor SABO verdi Gagauziyanın şkolalarına kompyuter yardımı.

Kompyuterları verirkenä Şandor SABO urguladı, ani bu – Vengriyanın Moldovaya yaptı yardımnarın birisi. Taa ileri, moldovalıları koronavirus belasından korunmaa deyni, başka yardımnar da yapıldı.

Kompyutorları Gagauziyanın adından kabletti Başkan İrina VLAH, adayıp, ani, Gagauziya üüredicilik Upravleniyasının yolunnan, bu kopyuterlar şkolalara etişecek.



Litva Gagauziyada güneş enerjisi stantıyaları kurêr

Harman ayın (avgust) 10-da, Gagauziyaya geldii zaman, Litva Respublikasının Moldovada Büükelçisi Kăstutis (Kęstutis) KUDZMANAS adadıydı, ani Gagauziyanın kimi bolnițalarında hem şkolalarında Litva birkaç güneş enerjisi stantıyaları kuracek. Bu proektın paası 500 bin evroyu aşacek.



Büükelçi Kăstutis (Kęstutis) KUDZMANAS açıkladı, ani güneş enerjisi stantıyaları kullanmasında Litva Respublikasının büyük başarıları var, da Gagauziyada soñial kuruluşlarda stantıyaların kurulması verecek kolayını bu kuruluşlar enerjiya harçlarını aazaltsınlar.

Kăstutis (Kęstutis) KUDZMANAS kendisi gezdi hem baktı Gagauziya-da bu proekta girän bolnițaların hem “Mihail ÇAKİR” pedagogika kolecin bu urda kolaylıklarını. Söz gelişi, kolecin örtüsündä ozaman artık başladıydılar erleştirmää 59 bin evroluk stantıyaları.

Bu türlü stantıyaları kuraceklar Gagauziyanın herbir rayon bolnițasında hem, “Mihail ÇAKİR” pedagogika kolecin kaarä, taa iki üüredicilik kuruluşunda.

Galina SİRKEĻİ “Ana-boba evi” muzeyini açtı

Başküüyündän Gagauzluun büyük patriotu, yazıcıyka hem pedagog, Komrattaki “Mihail ÇAKİR” pedagogika kolecin gagauz dili hem literaturası üüredicisi Galina Dimitrievna SİRKEĻİ açtı kendi ana-boba evindä gagauz kulturasını hem adetlerini, literaturasını hem bilgiçliini, yaşamasını hem insannını annadan “Ana-boba evi” etnografiya muzeyini. Muzey için taa uygun er yoktu nicä bulmaa, çünkü bu evi 1959-cu yılda yaptı hem Galina Dimitrievnanın bobası, Başküüyündä gagauz dilindä ilk üüredici – Dimitriy Semönoviç KRİSTİOĞLU.

Halkımızın kültürası, istoriyası, ruh zenginnii, yaradıcılı evelki vakıtlardan kalan ev tertiplerindä, folklorunda, adetlerindä, sıralarında. İnsanın canında varsa saygı o evelki, dedelerindän kalan zenginnä, var umut, ani o vatanını, nicä anasını koruyacak, halizdän sevecek. Bölä bir insan Galina Dimitrievna SİRKEĻİ, ani yaşamasını Gagauzlaa adadı, ani, yardımcılarının, kurdu bu gözäl muzeyi – erleştirip taa bir sedef gagauzların kultura gerdanına.

Nicä düşer gagauz evinä “Ana-boba evi” muzeyi kurulu üç içerdän, kufnedän hem hayattan. Bir içerdä kurulu düzen, durêr sandık, patta erleştirili üklük, angısında kıvrak yıvılı döşek, yorgan hem yastıklar. Tavandan sallangaç asılı. Kışın bu içerdä aylä taa çok vakit geçirirdi, iş yapardı, gecelärdi. İçerin donaklı: duvarda kilim, ramkalar, peşkirlär, patretlär. Kapunun yanında duvarda giimnär-rubalar asılı.

Taa bir küçük içër – kamara: duvarda kilim, ramka, rubalar, peşkirlär, patretlär, dorojkalar, sandık, taa bir kırivat hem küçük kırivat-sallangaç. Sandığın iç kapaanda yazılı bir aynenin önemni dataları: herbir uşaan duuması. Duvarı komuşuların, hısınların eski düün, aylelerin, küüdeki insannarın patretleri.

Büük baş (içër) düzüülü düünä karşı. Sandıkta çiiz dizili: orada yıvılı döşeklär (üç döşek), yorgannar (üç yorgan) da hepsi onnar kapalı çarşaf- larlan; masada boşçalıklar (gelinä, güveeyä, onnarın hısınlarına, sadıçlarına baaşış – plat, gölmek, fistan, batik); iki pençerenin arasıda duvarda bantalı küçük ayna, kapunun yanında el işi – büyük ayna (onu 1952-ci yılda yapmış küüdä yaşayan usta – Vasiliy Vasilyeviç VİDOV; duvarda güllü kilim (bu kilim Kongazdan, onu muzeyä baaşladı Komrattaki “Mihail ÇAKİR” pedagogika kolecin direktoru Mariya Dimitrievna TANASOVIÇ, kilimi kırmış Canabisinin anası Vasılısa Stepanovna TELPİZ. Büük içerin taa bir donaklı – kırivat (düzüülü ölä, nicä o vakit Başküüyündä düzärdilär), kırivat dö-

şeli eni döşek, eni yorgan, kırivatın bir başından öbür başından serili ip hem o ipin üstündä kırivatı kapadêr çarşaf- lar.

Taa bir içër – kufnä: sobaylan plita, neredä imää yapardılar; üç ayaklı sofra, büyük üüsek kufnä dolabı, neredä çanak- ları hem başka sofra takımınarını tutar- dılar, pençerenin urunda küçük dolap, neredä ekmek hem imelik koyulardı.

Herbir içerin sol köşesindä banta- larlan ikona donaklı.

Haytta durêr sandık, ev çalışmak tertipleri, avadannıkları. Sergennerdä türlü-türlü çölmeklär, ütü, lampalar h.t. b. Taa var kıyatlar, dokumentlär, neredän var nicä gagauz dilinin üü-

dedelerimizä. Muzeyin en büyük uuru – ana tarafının, halkının özel kendi- liklerini korumaa, 1950-70-ci yıllar- da Başküüyündä yaşayan insanın ev- lerin donaklını, ev avadannıklarını göstermää, nekadar becerekli, çalışkan, kırnak, saburlu halkımız da gelän ev- ladboyalarında saygı halkına hem da sevda ana dilinä, vatanına kökleştirmää. Bobam sölärdi: “Nekadar da insanın zenginnii olmasa, onun en büyük zen- ginnii – ana dili, ruh kuvedi. Ruh ku- vedin sızıntısı da halkının sıralarında, adetlerindä, aynenin kanonlarında. Var- kana sevgi ana dilinä, var sevgi Vatanı- na, ozaman da belli olêr ruh zenginnii,



renmesi için informațiya kabletmää, görmää o bilgiç insannarın, üüredici- lerin, üürenicilerin, yazıcıların patret- lerini, meraklı olaylarlan tanışmaa h.b.

Ayrıca bir duvarda, Ay Boba Mi- hail ÇAKİRin patredin dolayında bulunêrlar anılmış insannarın, üüredi- cilerin, üürenicilerin, yazıcıların pat- retleri, kim çok zaamet koydu, ki ga- gauz dili yaşasın, üürenilsin, ilerlesin.

Evin sundurmasında da ev avadan- nıkları hem tertipleri dizili. Aul içindä var çöşmä pınarı hem baseyna.

Muzey için annadarak Galina Di- mitrievna SİRKEĻİ deer: “Bu mu- zey – o bir saygı, sevgi anaya-bobaya,

insannık kaliteleri”.

Galina Dimitrievna SİRKEĻİ büyük hodulluklan ilerleder sözünü: “Büünkü gündä “Ana-boba evi” muzeyin fondun- da 3000 eksponat toplu. “Ana-boba evi” düzüldü birliktä onnarlan, kim sever ana tarafını, ana dilini, kimin canı haşlak, kim bir tarafta kalmaz, danıştıynan on- nara yardım için. Damnaya-damnaya göl olêr. Herbiri birêr taş koyarsa, bayır olêr. Eksponatların çoyu kaldı bobamdan. Ama genä muzeyin eksponatları zeede- lendi insannarın yardımınan. Saa olsun onnar kim yardım etti, verdi, getirdi paalı işleri analardan-bobalardan, babuların- dan, dädularından; komuşularım, küüdä



yaşayannar, komratlılar, dostlarım, hı- sımınarım, üürenicilerim, koleğalarım: kolecin direktoru Mariya Dmitrievna TANASOVIÇ, Anna SİRKEĻİ, Vasılısa SAKALI, Lena hem Valya AVRAMOĞ- LU, Olga ÇERNOCIȚA, Aleksandra MARINOVA, Anna SUKMAN, Alla ARNAUT, Tatyana İNATOVA, Olga TRETYAK, Albina SARI hem taa çok ad var nicä sıralamaa. Büük yardım oldu ikinci anamdan, kocamın mamusundan, Mariya SİRKEĻİ-AVRAMOĞLUDan, Mançi bulüdan, nicä onu küüdä bilerlär. O erleşirdi düzeni, nasaat verdi hem yar- dım etti donaklamaa içêrleri ölä, nesoy- du onun kendi evi 1960-70-ci yıllarda. O düzendä kendisi pala dokuyardı. Topla- maa, erleşirmää, tertiplemaa bu eksp- onatları yardım ettilär muzeyin eksperti Svetlana Yakovlevna ROMANOVA; na- şam – Elena BUZİLOVA-RATKOĞLU, kızkardaşlarım: Varvara SİRKEĻİ, Lüdmila KRİSTİOĞLU-İVANÇUK; hısım- narım: Lena AVRAMOĞLU, Mariya KRİSTİOĞLU-TANASOĞLU, Tatyana PİRON, Marina BRATUNOVA, Georgiy SİRKEĻİ, Vladimir KRİSTİOĞLU. Muzeyin kurulmasında ANTREC Mol- dova prezidenti Svetlana LAZAR çok nasaat verdi, inandırdı, ani bu iş lääzım olsun hem nicä lääzım olsun”.

“Ana-boba evi” muzeyin ofițial açılışına katıldı Gagauziya Başkanı İrina VLAH, angısı baaşladı muzeyä bir fotoaparât hem video kamera. Ken- di kutlama sözlerini açılıştä söledilär Gagauziyanın kultura Upravleniyanın başı Marina SEMENOVA hem Başkü- üyün primarı Sergey SAPUNCI.

Fotolar: vlah.md



“ANA SÖZÜ” Gagauz dilindä gazeta
Çikêr 14.08.1988 beeri

Kurucu “ANA SÖZÜ” S.R.L.
Sertifikat No. 1003600086420

Todur ZANET
Baş redaktor

İndeksi - PM – 21358

Gazeta “Universul” basım evindä basilêr
Tiraj – 3020 ekz. Sımarlamak No: 855

YAZIŞMA ADRESİMİZ:
RM – 2028, Moldova, Kişinêu,
c/p Nr. 1025. Tel/fax: 022 28-18-04
e-mail: todur.zanet@gmail.com
zanet@anasozu.com